

Performance Teatral pa Recepcion Oficial y ceremonia publico

Pa nos Rey Willem Alexander y nos Reina Maxima...!



ORANJESTAD (AAN): Diaranson 20 di november, algo promer cu 10 or di mainta nos Rey Willem Alexander y Reina Maxima a yega dilanti di bestuurskantoor.

For di e area di Renaissance Hotel te na e entrada di oficina di Gobernador por a mira e hobennan di Popcorn Dancers, Teatro Experimental di Aruba, y GDA, cu'n performance teatral pa duna nos Pareha Real, un Caluroso y Colorido bon bini...!

Manera nos tur sa, diaranson mainta a toca Rey Willem Alexander, Reina Maxima y e delegacion for di Hulanda pa hasi un bishita oficial na Gobernador y Gobierno di Aruba. Na nan yegada na altura di Renaissance Hotel nan a wordo saluda pa su excelencia Gobernador di Aruba y Promer Minister y tambe p'e grupo di teatro aki cu a capta atencion di prensa y tur presente.

Despues di esaki e pareha real a para keto pa asina scucha e himno di Aruba y himno di Hulanda. Un rato despues dos hobencita di Casa Cuna a entrega algun flor na Reina Maxima. Na momento cu e parti aki a termina e pareha real a sigi na pia pa asina yega na oficina di Gobernador di Aruba. Aki a tene un reunion cortico mirando cu tabata tin mas reunion riba nan agenda. Despues di a topa cu Gobernador a continua un encuentro cu miembran di Parlamento di Aruba y tambe Promer Minister di Aruba y e consejo di Minister.

Tabata un momento sumamente agradabel pa wak nan presencia na Aruba y mas ainda e cantidad di hende grandi, Coro di Maybeline Arens Croes, Grupo di Baile Club di Movimiento y e cantidad di muchanan cu tabata presente pa duna nan un bonbini caluroso, cu e cariño caracteristico cu a haci Aruba asina bon conoci.

Aruba mescos cu tur otro provincia y teritorio Hulandes ta ricibiendo e bishita di introduccion di e pareha real, pa fomenta y duna mas contenido y forsa na e bon relacion entre e paisnan den Reino Hulandes.

E acto teatral aki a ser presenta pa Departamento di Cultura Aruba hunto cu e hobennan di Popcorn Dancer's y GDA.

Un gradicimento special ta bay pa Allan Goede p'e invitacion, señor Freddy Tromp p'e cooperacion di semper, John Flemming p'e coordinacion general, Michael Duglas p'e diseño di e paña, La Linda p'e sosten di e tela,

Angela Velasco p'e makiyahe y e pinturanan riba e paña, Maria Teresa Martinez p'e concehonan artistico y Freddy Montoya di DCA pa yuda crea e performance aki hunto cu e hobennan dinamico cu a participa.

E gruponan aki a demostra nan respet y e amor pa nos

Pareha Real pa medio di arte y nan a desea na nos Rey Willem Alexander y Reina Maxima hopi exito den nan funcion nobo como hefe di estado.

E relato aki a ser tuma for di un nota reportahe di e actividad cu ta aparece publica riba facebook.

